

# Канон преподобному Иову Почаевскому

Память празднуем 28 октября (10 ноября)

Тропарь, глас 4-й

Многострадальнаго праотца долготерпение стяжав, Крестителю воздержанию уподоблялся, Божественныя же ревности обою приобщаяся, тех имена достойно прияти сподобился еси и истинныя веры был еси проповедник безбоязнен; темже монахов множества ко Христу привел еси, и вся люди в Православии утвердил еси, Иове преподобне отче наш, моли спастися душам нашим.

КАНОН, глас 8-й

Песнь 1

*Ирмос:* Посеченный несекомаго пресече, и виде солнце землю, юже не виде; лютаго врага вода потопа, и непроходимое пройде Израиль; песнь же воспевашеся: Господеви поим, славно бо прославися.

*Припев:* Преподобне отче наш Иове, моли Бога о нас.

Ангела земнаго и Небеснаго человека, Иова преподобнаго, Вольнскую похвалу, достойно воспети помози ми, Слове Божий, презирая моя прегрешения и подавая слово устом моим.

Преподобне отче наш Иове, моли Бога о нас.

Был еси, преподобне, воистинну миру светильник пресветел, всем путь спасения показуй; темже и мне буди помощник, во еже прославити житие твое и умиление стяжати.

Преподобне отче наш Иове, моли Бога о нас.

В дому родителей твоих перее познал еси Господа, Иове славне, и, отрок сый, разум совершен показал еси, егда монашеское житие изволил еси, вся же житейская провидев, Единого Бога возлюбил еси.

Преподобне отче наш Иове, моли Бога о нас.

Горю очи твои и душу вознося, во обители Угорницей братию в Богоугодном житии скоро превозшел еси, худша всех себе помышляя и тем лучший Иисусу являясь, старцем же и юным образ быв прелюбезнейший.

*Слава:* Добре ты на диаволы воинствовавши помышляя, преподобне, своея стыждуся лености и множества грехов моих ужасаюся: но твоими, святе, молитвами даруй ми желание благое, во еже прочее время жития моего в покаянии скончати.

*И ныне:* Яко Божия Мати дерзновение имущи к рождаемому из Тебе Единородному Слову, и Отцу Собезначальному, и Соестественному Духу молящи не престай от бед спасти, Всенепорочная, Ты, Богородицу, славящая.

Песнь 3

*Ирмос:* Утвердися сердце мое во Господе, вознесся рог мой в Бозе моем, расширися на враги моя уста моя, возвеселихся о спасении Твоем.

Преподобне отче наш Иове, моли Бога о нас.

Есть во мне, отче преподобне, добраго исправления желание, но искушения лености побеждать не навыкох, увы мне. Обаче на помощь твою надеясь, уныния помыслы отгоняю, на твою жезираю славы подвиги.

Преподобне отче наш Иове, моли Бога о нас.

Железо наречется род твой, Иове преподобне, крепость души твоея предуказуя; в пещере же каменне заключився, яко золото сокровено, освятил еси место подвиг твоих и гору Почаевскую, яко стену медяну, противу врагов Православия явил еси.

Преподобне отче наш Иове, моли Бога о нас.

Зело углубишася помышления твоя яже о Небеснем Царствии, егда, еще отрок сый, Ангельский образ восприял еси; темже и священник быв Богу верен, даже ныне моления о людех возносиши, Иове преподобне.

Преподобне отче наш Иове, моли Бога о нас.

Земля Галицкая юностию твоею славится, и Дубенская обитель мужеския подвиги твоя благовествует, обитель же Почаевская старостию твоею хвалится и блаженною кончиною веселится, вся же вселенная о чудесах твоих радуется и ликовствует.

Слава: Иже подаеши благая всем, молящимся тебе, и мене припадающа не отрини, святче, но, покаяние мое зря, даждь ми жития исправление, ревность же вдохни, еже подражати твоим Боголюбивым деянием.

И ныне: Умерщвленный мой ум животным действием из Тебе, Явльшимся миру, воздвигни, Чистая, и к жизни настави, Яже смерти двери разоршая Единая Рождеством Твоим.

Господи, помилуй (трижды).

#### Седален, глас 8-й

Днесь исполняется радости обитель Почаевская, твое Боголюбивое житие прославляючи; днесь христоименитии людие ревностию спасения просвещаются, зряще нетлением прославленные мощи твоя, преподобне; днесь греховныя отгоняются страсти, и помыслы покаяния души наша объемлют, в нихже утверди всех, преславне, верно почитающих память твою.

Слава, и ныне: Яко Всенепорочная Невеста Творца, яко Неискусомужная Мати Избавителя, приятелище яко сущи Утешителя, Всепетая, беззакония мя суща скверное обителище и демонов игралище в разуме бывша, потщися от тех злодейства мя избавити и светлое жилище добродетелей соверши, Светоносная Нетленная, отжени облак страстей, и Вышняго причастия сподоби, и Света Невечернаго молитвами Твоими.

#### Песнь 4

Ирмос: Пророк Аввакум умными очима провиде, Господи, пришествие Твое, тем и вопиаше: от юга придет Бог. Слава силе Твоей, слава низхождению Твоему.

Преподобне отче наш Иове, моли Бога о нас.

Иове преподобне, о всех молитвенник буди теплый, твоему заступлению верующих, свое же окаявающих житие и на Божие милосердие уповающих, аще и прельщенными жития сего влающихся.

Преподобне отче наш Иове, моли Бога о нас.

Кто от человек не подивится долготерпеливому житию твоему, отче, кто ли не прославит твоей о Православии ревности, ты бо, яко алмаз крепок, еретиком

противостал еси, и истинныя веры проповедание словеси же и писаньми всем преподавал еси.

Преподобне отче наш Иове, моли Бога о нас.

Льва рыкающая и ищуща поглотити души спасаемых молитвою твоею победил еси, отче, но и тому служащия люди в покаяние приводил еси, тати милосердием твоим постыждая и вразумляя, грабители же обличеными устрашая и вся научая спасительному покаянию.

Слава: Мрак души моей, отче, предстательством твоим разсей и светом заповедей Господних просвети мое окаянное сердце, да и аз, твоим учеником последуя, тех части лишён не пребуду, твою восхваляя святую память.

И ныне: Бога, из Тебе воплощенного, моли непреложно, Еже бе пребывша и естественна равна Отцу, и Духу сопредельна, прощение прегрешений и душ спасение поющим Тя верую даровати.

## Песнь 5

*Ирмос:* Мрак души моей разжени, Светодавче Христе Боже, началородную тьму изгнав бездны, и даруй ми свет повелений Твоих, Слове, да, утренюя, славлю Тя.

Преподобне отче наш Иове, моли Бога о нас.

Наш еси воистинну предстатель и чудотворец пресветлый, зываше Дионисий, обретенный мощи твоя, тлению непричастны. Мы же, сия лобызающе, вопием: наших скверн не возгнушайся, угодниче Божий, но твоими молитвами сия очисти.

Преподобне отче наш Иове, моли Бога о нас.

Оправданием Божиим от юности, отче, научаемь, суеты житейския уклонитися крепко возжелал еси, безмолвие же возлюбил еси: обаче велению Христову не противляясь, притекающая к тебе правому исповеданию и евангельскому житию научил еси.

Преподобне отче наш Иове, моли Бога о нас.

Предстатель явился еси и по преставлении твоём страждущим и скорбящим человеком: тако бо ты видеша людие, из гроба твоего исходяща и со Ангелы посреде церкви молящаяся. О, чудо преславное воистинну! О, радость верным и утверждение!

Преподобне отче наш Иове, моли Бога о нас.

Рачитель быв Небеснаго Царствия, о своём тамо вхождении известуешься и кроме болезни и страха пресельник являешься лучшая жизни, братии же твоея учитель и упование.

Слава: Сопутник житию моему буди, отче Иове, молитвою твоею ограждай многмятежную мою душу и введи ю в Небесное Царство, твоими умиленную подвиги, Христу же покаянныя приносящую слезы.

И ныне: Тя стену имуще и предстательством Твоим соблюдаеми, Твоею Божественною славою хвалящаяся, Тя блажим: Ты бо, Всечистая, душам нашим источаеши веселие и радование.

## Песнь 6

*Ирмос:* Иону в ките, Господи, единого вселил еси, мене же связана мрежами вражими, яко от тли онаго спаси.

Преподобне отче наш Иове, моли Бога о нас.

Твёрдое упование на предстательство твоё возлагаю, преподобне, и верою молюся: даждь ми страстей лютых одоление, смерти же непрестанную память и блаженства желание грядущаго века.

Преподобне отче наш Иове, моли Бога о нас.

Утверждается тобою, преподобне, Святая Церковь, ересь же всякая посрамляется, обличение имущи твоя многоцелёбныя мочи, и жития твоего столетняго труды, и болезни, и слёзы, и пост, и плоти от костей отпадение.

Преподобне отче наш Иове, моли Бога о нас.

Фараона мысленнаго побеждаше Иов преподобный, послушанию всегда прилежа и обуреваемым на помощь приходиши не отрицаяся: и тако три обители учением своим просветив и подвиги многими прославив, веселяше Спаса всех, Человеколюбца.

Преподобне отче наш Иове, моли Бога о нас.

Христову смирению подражал Иов, егда начальство яко служение всем прият и, игумен сый, в тяжких службах подвизашеся, братии же быше образ кротости, и трудолюбия правило, и о молитве присное напоминание.

Слава: От скверных избави мя страстей твоими молитвами, тех одоление мне подавая Божественныя помощи присным призыванием, и на себе ненадеянием, и брата моего неосуждением.

И ныне: Вознесла еси всеистинно падшее человеческое существо во зраце Божественном, и Отца в равенстве видимаго Сына Неизменнаго, Богомати, без семени во чреве поносивши.

Господи, помилуй (трижды). Слава, и ныне:

Кондак, глас 4-й

Явился еси истинныя веры столп, Евангельских же заповедей ревнитель, гордыни обличение, смиренным же предстатель и научение: темже и ублажающим тя грехов отпущение испроси и обитель твою невредиму сохрани, Иове отче наш, Многострадальному подобный.

Икос

Отверзи уста твоя, пещеро каменная, и рцы нам, колькраты токи слез Иовлих омочилася еси, како того въздыхания твоих стен не расторгоша, како, Свет Божественный тебе не сожже, како Ангели бденным подвигом Иовлим дивишася, теми бо освятися земля Галицкая и Волынская; мы же, сия вся помышляюще, слезами умиления очи наши исполняем: есть бо преподобный Иов угольник дивный, Многострадальному подобный.

Песнь 7

Ирмос: На поле Деире иногда мучитель пещь постави на мучение Богоносных, в нейже три отроки песнословяху Единого Бога, трично воспеваху, глаголюще: отцев Боже, благословен еси.

Преподобне отче наш Иове, моли Бога о нас.

Люди православныя, ты блажащия, преподобне Иове, укрепи на враги и о Церкви мирная глаголи в сердце их, всем единомыслие испроси у Бога, и друг ко другу любовь, и о Православии ревность.

Преподобне отче наш Иове, моли Бога о нас.

Ча́шу жити́я Твоего́ пи́ти, Го́споди, не могу́ аз, окая́нный, бо́язнию скорбе́й  
обурева́емь и страсте́й сплета́емь те́рнием, оба́че молю́ся: Иова, Твоего́ уго́дника,  
моли́твами поми́луй мя и помози́ ми грехо́вную отрясти́ ле́ность.

Преподо́бне о́тче наш Иове, моли́ Бо́га о нас.

Широ́кий путь, поги́бель ду́ши преднося́щий, возненави́дев, Иове преподо́бне, в  
те́сней пеще́ре заклю́чился еси́ и те́снаго пути́ жи́зни в нача́льстве твоём не  
укло́нился еси́, день и но́щь в моли́тве и труде́х пребыва́я и науче́ние здра́вое всем  
приходя́щим к тебе́ подава́я.

Слава: Щедр был еси́ ни́щим, ка́ющимся же ми́лостив и науче́ния тре́бующим  
учи́тель кро́ток, Боже́ственныя же му́дрости люби́тель и Ева́нгельских за́поведей  
пропове́дник, книг же Боже́ственных изда́тель и е́реси безбо́язненный обли́читель.

И ны́не: Мари́ю Пречи́стую и Всесвяту́ю восхва́лим: То́ю бо благода́ть нам  
источа́ется па́че ума́ даро́в, я́ко от пото́ка Боже́ственныя бла́гости, Ю́же  
благоче́стивым по́мыслом ны́не ублажа́ем.

## Песнь 8

*Ирмос:* Покрыва́яй во́дами превы́спренняя Своя́, полага́яй мо́рю преде́л песо́к и содержа́й  
вся, Ты поёт со́лнце, Ты сла́вит луна́, Тебе́ прино́сит песнь тварь, я́ко Содо́телю всех во  
ве́ки.

Преподо́бне о́тче наш Иове, моли́ Бо́га о нас.

Едущим и иду́щим во оби́тель твою́ безчи́сленным лю́дем, ко твои́м же моще́м  
припа́дающим, бу́ди дарова́ний духо́вных пода́тель, теле́сных же боле́зней цели́тель и  
пред Спа́сом те́плый о всех предста́тель, Иове, земли́ Воли́нския сла́во и украше́ние.

Преподо́бне о́тче наш Иове, моли́ Бо́га о нас.

Юноша те́лом, но ста́рец умо́м в нача́ле мона́шескаго жити́я твоего́ был еси́, о́тче:  
состаре́вся же плоти́ю, ю́ношескую бо́дрость в труде́х явля́л еси́, земли́ копа́нием и  
древе́с насажде́нием о́браз всем смиренному́дрия подава́я.

Преподо́бне о́тче наш Иове, моли́ Бо́га о нас.

Явле́ние твоё со Ангелы́ вку́пе смире́нную де́ву ужаса́ше, здра́вие же ученику́  
твоему́ подава́ше и вся лю́ди на славосло́вие Бо́гови воздви́заше, и́стинную же  
утвержда́ше в них ве́ру и ерети́ческая отрева́ше нападе́ния.

Слава: Фими́амом моли́тв твои́х и мене́ облагоуха́й, Иове пресла́вне, мои́х грехо́в  
злосмра́дие тем отгоня́я и упова́ние на Го́спода вселя́я в мою́ смра́дную ду́шу, да  
благода́тию Бо́жиею очища́емь, воспою́ твоё, преблаже́нне, крѣпкое заступле́ние.

И ны́не: Богороди́тельнице Всечи́стая, ду́ши моея́ я́звы и грехо́вныя стру́пы  
очи́сти, исто́чником омы́вающи су́щим из ребр Сы́на Твоего́, и поте́кшими из тех,  
очища́ющи, струя́ми: к Тебе́ прибега́ю и Ты призыва́ю, Богоблагода́тную.

## Песнь 9

*Ирмос:* Благослове́н Госпо́дь, Бог Изра́илев, воздви́гнувый рог спасе́ния нам в до́му  
Дави́дове, о́трока Своего́, в ни́хже посети́ нас Восто́к с высоты́ и напра́вил ны е́сть на путь  
ми́ра.

Преподо́бне о́тче наш Иове, моли́ Бо́га о нас.

Иссо́пом благода́ти Бо́жия окропи́ сердца́ на́ша, Иове преподо́бне, твои́м святы́м  
моще́м покланя́ющихся, да твоея́ ре́вности о ве́ре причастивше́ся, ко исполне́нию  
за́поведей Христо́вых до́бре потщи́мся.

Преподобне отче наш Иове, моли Бога о нас.

Псаломски зывати к Богу на земли не преставал еси, и дества твоего сосуд соблюл еси: темже на Небеси райския воспеваше ныне песни со Ангелы и всеми святыми, люди же, на земли трудящиеся, от Вышних назираше.

Преподобне отче наш Иове, моли Бога о нас.

О, колика жития твоего нетленная красота, о, колика по смерти твоей чудеса и исцеления! Се бо земная оставив, воистинну сторицею Небесная блага еще в житии, паче же во грядущем, по глаголу Христову стяжал еси.

Слава: О, колико грехов наших множество! Но сия превосходит твоих молитв крепость, ихже не лишит нас, отче преподобне Иове, друже Христов и святых всех сопричастниче, церковный столпе и о душах человеческих предстателю теплейший.

И ныне: Зачала еси, Дево, без семени, всяческая создавшего Слово Божие, кроме хотений плотских, и без истления родила еси, без болезней матерних. Тем Тя, Богородицу, и языком, и сердцем исповедающе, величаем.